

# Goibekokale

ELGETA / Barikua / 2005eko urriaren 14a / 242. zenbakia

KOORDINATZAILEA: Irati Agirreazaldegi • Barrenkalea 33 BERGARA 20570 • Tel.: 943 25 05 02 • Faxa: 943 25 05 13 • Posta elektronikoa: goibekokale@goiena.com • Lege gordailua: SS475/95

## Hondarribiko arraunlariek omenaldia jasoko dute urriaren 22an Elgetan

IRATI AGIRREAZALDEGI

**Aurten Kontxako bandera sonatua eskuratu du Ama Guadalupekoa traineruak. Hondarribikoek Elgetako koadrila batekin duten harremana dela-eta, datorren urriaren 22rako omenaldia antolatu dute; eta lehiarik ere ez da faltako egun honetan.**

Orain dela urte batzuk Elgetako lagun koadrila batek Hondarribiko Arraun elkartera egin zuen bisita. "Instalazioak ikusi, traineruan ibili eta arraun giroa ezagutzeko aukera izan genuen; eta egun polita pasa genuen bertakoekin", esan digu Josu De Vega koadrilako kideak. Gerora, hainbat estropada saiotan izan dira elgetarrak Hondarribiko trainerua animatzen.

Egun horretan ongi pasa zutela-eta eskertzeko beharra ikusi zuten elgetarrek. Josu De Vegak esan digunez, "hain entzutetsua den Kontxako bandera irabazi zutenean, iruditu zitzaigun une egokia zela omenaldia eta eskerak emateko ekitaldi xume bat

egiteko; eta hala urriaren 22rako antolatu ditugu hainbat ekintza".

### SOKATIRA ETA BOLO-JOKOA

Hondarribiko arraunlariak eta zuzendaritzako kideak etorriko dira egun horretan Elgetara.

Eguerdian ohorezko aurrerakua dantzatuko diete plazan, eta ondoren udaletxean harrera izango da. Bertan, omenaldia gertatu duten herriko bi koadrilek eta Udaleko ordezkariak oroigarriak emango dizkiete.

Arraunean erakusten duten indarra beste kirol batzuetan ere azaldu beharko dute egun horretan Hondarribiko arraunlariek. Izan ere, omenaldia egin ostean, plazan sokatiran jardungo dute arraunlariek elgetarren kontra; eta baliteke Isuntzako arraunlariak ere etortzea, egun horretan Abadiñon hitzordua dutelako. Sokatiran ez ezik bola-jokoan ere lehiatuko dira.

Ondoren, poteoa egingo dute eta gero guztiek batera Intxorta elkartean bazkaldu. Goizean barrena gainera, Espaloian Hondarribiko traineruak jokaturako estropaden irudiak ipiniko dituzte, bideoan.

### DATORREN URTEAN BERRIZ

Omenaldia antolatzen buru-belarri dabilen Josu De Vegak esan digunez, "datorren urtean Hondarribira berriz joateko asmoa dugu, eta baliteke orduan elgetar gehiago ere animatzea. Merezi du traineruan ibiltzea eta hango giroa ezagutzeta".

*Elgetako bi koadrilak eta Udalak omenduko dute Hondarribiko trainerua*



Ama Guadalupekoa traineruarekin hainbat bandera irabazi dituzte Hondarribiko arraunlariek amaitu berri den denboraldian.

## MIKEL ORBAÑANOS/HONDARRIBIKO ENTRENATZAILE ETA ARRAUNLARIA "Denboraldia ezin hobea izan da; Kontxan irabazi eta TKE ligan erregular ibili gara"

I.A.

**A**urten Hondarribiko traineruak lortutako emaitza bikainetan izango zuen zerikusirik Mikel Orbañanos entrenatzaile eta arraunlariaren lanak. Denboraldiaz eta Elgetarako bisitaz jardun dugu.

### Denboraldia amaituta, zein balorazio egiten duzu?

Ona. Urtea nola joan den ikusita gustura gaude. TKE ligan erregular ibili gara hasieratik; gainera, lau garaipen eskuratu ditugu. Bestalde, gure ilusioa zen Kontxako estropadan lan txukuna egitea, eta lortu dugun emaitza, bandera, alegia, ezin hobea izan da. Oso pozik gaude egindakoarekin.

### Hasi zarete hurrengo denboraldia gertatzen?

Orain atsedean hartzeko ordua da. Hilabete eta erdiko oporrak difugu eta askok kanpora joateko aprobetxatzen du. Hala ere, ni neu hasi naiz datorren denboraldian pentsatzen. Azaroan ekingo diegu berriz entrenamenduei.

### Ze aurreikuspen egin duzue?

Ez dakigu taldea nola geldituko den, baina arraunlarien gehiengoak jarraitzen badu, aurtengo mailari eustea izango da gure helburu nagusia.

### Ez al da arraroa Elgetak egitea omenaldia?

Bada, ideia bitxia iruditu zitzaigun; baina era berean pozgarria Elgetako jendea gurekin gogoratzea. Izan ere,



harriduraz jaso genuen deia, baina oso gustura joango gara. Arraunlariak esperientzia berri hau bizi izateko gogotsu daudela esan didate. Elgetarrei eskerrak eman nahi nizkieke, guztien partetik.



**RECYDE, S.A.**

Pagotza pol. ind. 20690 ELGETA, Gipuzkoa  
Tel.: zentrala: 943 78 80 00. Faxa: 943 78 90 10  
Posta elektronikoa: recyde@recyde.es



ER-0182/2/95

ISO 9002  
QS 9000  
ISO/TS 16949

KULTURA

# Yllana konpainiaren '666' antzezlan gaur iluntzean Espaloia Kafe Antzokian

Antzerkia eta musika izango dira Espaloiko hurrengo ekitaldien ardatz. Gaur iluntzean Yllana taldearen ikuskizuna egongo da; martitzenean, berriz, hamaika musikariek emanaldia eskainiko dute eta datorren barikuan jazz kontzertua izango da.

Umorezko antzezlan ikusteko aukera izango da gaur, 22:30ean, Espaloian Yllana antzerki taldearen eskutik. 666 obran, heriotzaren korridorean egingo dute topo lau presok. Horren egoera negargarriari barrez eta ikuslari barre eginaraziz aurre egiteko gauza izango dira.



Umorez landuko dituzte heriotza, biolentzia eta halako gaiak Yllanakok.

BI MUSIKA EMANALDI

Antzerkiari musikak hartuko dio lekukoa datorren astean. Martitzenean, hilaren 18an, hamaika kantarik batera jardungo dute. Lauaxetari omenaldia izango da *Ehungarrenean hamaika* kontzertua. Emanaldia 20:00etan hasiko da eta honako musikariek abestuko dute: Mikel Urdangarin, Gari, Eñaut Elorrieta, Rafa Rueda, Jabier Mugurutz, Anje Duhalde, Txuma Murugarren, Petti, Xabier Montoia, Xabi Strubell eta Francis Diezek.

Bestalde, hurrengo barikuan, urriaren 21ean, Mac Jeara's Band taldeak *Jazzaren abiadurak* ikuskizuna eskainiko du 22:30ean. Emanaldia Udalak eta Kutxak antolatu dute elkarlanean.

GARRAIOA

# Hitzarmena garraio zerbitzu berezira

Udalak hitzarmena egin du Gipuzkoako Foru Aldundiarekin 2005-2006 ikasturtean garraio zerbitzu berezia eskaintzeko. Foru Aldundiak gehienez kostuaren %60 ordainduko du, betiere muga 13.812 eurotan ipinita.

Iaz irailetik ekainera bitartean eskaini zuten garraio zerbitzu berezia. Udalak 25.192 euroko gastuak izan zituen. Gastu hauei aurre egiteko Foru Aldunditik 13.812 euroko dirulaguntza jaso zuten. Bidaiarien sarreretatik,

berriz, 3.154 euro. Beraz, Udalak 8.226 euroko galerak izan zituen.

Bidaiarietatik lortutako diru sarrerak kontuan hartuta azarozan ibili zen jende gehien; ia 600 bidaiari. Gutxien, berriz, maiztzean, kopurua ez zen 150 lagunera iritsi. Udan, berriz, jende gutxiago ibiliko zela aurreikusita taxi bidez egin zuten garraio zerbitzua. Uztailen 100 bidaiari izan ziren eta irailean zazpi.

Galerak ekarri arren, Udalak erabaki du aurten ere garraio zerbitzua eskaintzea, eta horretarako sinatu dute hitzarmena.



Hasi berri den ikasturtean ere Pesa konpainiak egingo du garraio zerbitzua.

LABUR

# Boluntarioak behar dira umeen zinema emanaldietarako

Datorren azaroaren 6an hasiko dira berriz domeka arratsaldeetako zinema emanaldiak; umeendako eta familiendako saioak, hain zuzen ere. Egun horretan hasi eta apirilaren 23ra bitartean filmak ikusi ahal izango dira domeka arratsaldero 17:30ean Espaloian. Zinema emanaldi hauek antolatzekeo ardura herriko umeen gurasoena da. Beraz, orain prestaketa lanean dihardutenek boluntarioen laguntza eskatu dute laguntza honetarako. Interesatuek Herri Eskolan Guraso Elkartekoek ipini duten zerrendan idatzi beharko dute euren izena. Saio bakoitzeko bi lagunek egon beharko dute. Haien ardura da aulkiak ipini eta jasotzea eta sarrera kobratzea. Filmak aukeratzeko orduan gurasoen iradokizunak ere eskertuko dituzte.

# Zazpi proposamen egin dituzte udal aurrekontuetarako

Udalak 2006ko aurrekontuak gertatzeko lehen pausoak ematen dihardu. Aurten lehen aldiz eman die aukera herriarrei aurrekontuen gainean proposamenak egiteko. Guztiak zazpi jaso dituzte. Horietatik hiru baserri inguruetan hobekuntzak egiteko izan dira (ur hornidura, bideak...); beste hiruk herri barruan hobekuntzak egiteko beharra ikusi dute; eta azken iradokizuna aparkalekuen gainekoa izan da, San Roke kaleko aparkalekuak, hain zuzen ere. Orain, zinegotzi eta teknikariek batzorde bakoitzean aurkeztu beharko dute euren aurrekontu proposamena, eta ondoren, dena bateratu eta egokitu ostean, alkateak zinegotzietatik aurkeztuko die haiek onar dezaten. Alkatearen asmoa da urtea amaitu aurretik aurrekontua onartzea udalbatzarrean.

HERRITARREN HITZA / Ana Gillegi - Kazetaria

# Estra-eskolar asko eta estra familiar bat ez

**Desastrea:** Titulu hau zuen Antonio Galak *La Tronera* sailean idazten zuen gaiak, larria.

Honoko datu hau ikaragarria: geroz eta gehiago dira gurasoak erasotzen dituzten seme-alabak.

Azken urteetan gure umeek duten boterea handitu dela iruditzen zait, ez dago umeak asetzeko modurik.

Gurasook sinesgarritasuna, konfiantza eta autoritatea galdu dugu umeen artean.

Geroz eta denbora gutxiago gure seme-alabekin egoteko, geroz eta harreman hotzagoak etxekoan artean, eta gure ardurak eta egin beharrekoak

hirugarren pertsonen eskutan: eskola, hezitzaile, zaintzaile...

Umeek gurasoen erreferentziak galduko dituzte zalantzarik gabe. Neska-mutikoak psikologoaren kontsultetan, asko, baina ez ote dira gurasoak ere han egon behar?

Familian hainbat gai landuko balira, ez litzateke hainbeste arazo egongo, eta lantzen ez direnez zalantzarik gabe hor daude denon ahotan/eskutan



"famiak badu egiteko bat: gure seme-alabak zorionsu hezte"

biolentzia, drogak (alkohola problema larri bat da, ez da hilabete 12 urteko neska-mutikoak mozkortuta ikusi ditugula), errespetu falta eskolan (nabarmena, irakasleekiko eta baita beraien eskola kideen artean)...

Ez pentsa *bulling*-a Hondarribin dagoela bakarrik, edo nerabe mozkorrak aldameneko herrian; ez pentsa irakasle edo helduei zor diegun begirunea alboko

etxean dagoenak ez duenik; ez pentsa bere seme edo alaba salatu duen gurasoak ez ditugunik.

Familiak badu egiteko bat (berdin zait nortzuk osatzen duten familia), gure seme-alabak zorionsu hezte. Baina zorionsun horretan ez nuke ipiniko eskatzen duten guztia ematea.

Erraza dirudi egiteko honek baina zein zaila burutzea. Zenbat konpetentzia inguruan! *Estra-eskolar* asko eta *estra familiar* bat bera ere ez.

*Men sana in corpore sano*, gorputza majo lantzen da baina burua...

**Aperribay, s.l.**

Marmoldegi eta granitoak

Pagatza indus. z/g.  
Tel. eta faxa: 943 78 90 21

20690 ELGETA